


地310.69

541

無錫侯病驥編

晉江鄉土志



奇樹明新學校刊

晉江鄉土志序

余來閩南調查溫陵之教育實業歷史地理物產風俗等爲旅行考鏡之資既而輯晉江鄉土志三十二課爲明新小學教授之用以晉邑各小學尙缺乏鄉土教本故不揣譎陋而成之倘各小學藉此引起幾多鄉土之資料爲兒童保持愛鄉之心漸進而爲愛國之心堅定其基址則斯編之付刊其或有裨於此邦小學兒童者乎竊願晉邑研究

小學教授之同人以匡正之幸甚

中華民國十一年十一月無錫病驥老人侯鴻鑑
志於奇樹明新講舍

晉江鄉土志

無錫侯鴻鑑編



第一課 位置及境界

晉江位於閩南。距閩侯省垣四百餘里。面積東西廣三十里。南北袤二百六十里。地勢東南濱海。西北連山。東界惠安之洛陽。西界南安之潘山。北界仙游之白葉山。南界同安。而以安海爲止。

第二課 建置及沿革

晉江古爲七閩地。秦號閩中。漢稱閩越。晉名晉安。梁曰南安。唐郡豐州。而縣晉江。宋以來。則郡泉州。而縣仍舊名。(晉江)今則易郡制爲縣制矣。

第三課 都里

城廂分東西南北四隅。共四十七都。都分社。或曰舖。社分鄉。鄉名繁夥。全邑共一千三百八十八鄉。如柿樹兜鄉。卽三十三都中之一鄉也。

第四課 山脈

清源峙域北十里。爲邑主山。其脈由仙游來。仙晉
交界處有白虹山。西南行而左右盤旋者。大帽山。
香爐山。朋山。一名雙乳山。至清源而氣爲之聚。高峯
曰齊雲。有三十六岩洞之勝。對峙於城之西南隅
者。曰紫帽山。其脈從南安大烏石山蜿蜒而來。雄
聳十二峯。有金粟凌霄之勝。南行數十里。曰羅裳
山。亦名山也。

第五課 河流

晉江之水。有二大河流。東北爲洛陽江。西南爲筍
江。洛陽江發源於邑東北諸山。由康溪長溪諸水。
合流而入於海。筍江承永春南安諸水。漚流而至
新門外。合溜石葛湖諸水。東行而至安海港。南入
於海。筍江卽晉江。以晉南渡時。衣冠望族多居
此。故名。

第六課 城郭

唐貞觀間。初築城。環植刺桐。故名刺桐城。周二十

里。宋時添築外郭。歷代以水患及倭寇。屢經修改。並建安海城於石井。永寧城於三十都之永寧。今則邑城之徑約八里。周二十四里。爲門七。曰仁風。義江。鎮南。朝天。通淮。臨漳。俗名新門通津也。

第七課 橋梁

邑有大橋四。曰石筍橋。宋皇祐初。郡守陸廣。始於筍江上流。造舟爲梁。號浮橋。紹興間。僧文會。改築石橋。長八十餘丈。筍江下流。有順濟橋。爲嘉定間

郡守鄒應龍造。長百五十餘丈。洛陽江畔。萬安渡。在宋慶歷初。郡人李寵。作浮橋。皇祐間。郡守蔡襄。建石橋。長三百餘丈。廣一丈五尺。襄自爲記。刻石橋畔。安海橋。一名海岸長橋。宋時建。長七百七十餘丈。約五里。董其事者爲陳亢。明弘治間。林孔彰等。與僧智鏡協修之。

第八課 學宮及書院

學宮有郡學縣學。郡學在迎薰門三教舖。坊曰海

濱鄒魯之坊。泉曰夫子泉。朱子遺跡也。縣學在行春門內。蔡巷。舊在行春門外。泉山書院故址。後遷今地。書院有六。溫陵書院。卽舊學改設。小山叢竹書院。有朱子手書之額。一因東北有高阜。地氣獨溫。故名溫陵。朱子曾種竹建亭。講學其中。手書小山叢竹。朱子石刻像。祀於過化亭中。石井書院。在安海鎮。崇正書院。卽施烺舊宅改建。梅石書院。在城東北隅。爲羅一峯講學處。故又名一峯書院。

清源書院。在城東隅。

第九課 名勝古跡

開元寺之雙塔。一東號鎮國。爲唐咸通年建木塔。宋紹興間易爲石塔。西號仁壽。梁貞明間造木塔。宋寶慶中易爲石塔。一承天寺之八景。一月臺倒影。石梅生香。蠅不朝天。榕不過牆。獅口吐煙。龜屨能行。一塵不染。石塔飛來。一清源山之蛻巖。虎乳泉。南臺寺之丸泉。紫帽山之凌霄塔。金粟洞。是皆

名勝之著者。羅裳山之畫馬石。（在玉鬢峯下。相傳爲羅隱所畫。）城隍廟之韓魏公（琦）血跡石。眞文忠（德秀）所建之眞濟亭。宋人修禊之洛陽亭。以及承天大殿爲鄭成功受朝賀處。崇正書院之古松。爲施靖海所移植。是皆古跡之著者。

第十課 名人事跡（二）名宦

唐令趙頤。開濬晉江。以通舟楫。宋守蔡襄。建萬安橋。以通往來。眞西山勦寇安民。朱紫陽存仁過化。

明顧洞陽之善政善教。（名可久。無錫人。修建書院。）錢立齋（名）之延師課士。（分詩書禮書春秋四館。）清孫朝讓之講經啜水。（字九芝。蘇州人。日啜清源一斛水。與諸生講經。）張召華之鞠讞稱神。（父訴子。大杖警人而教孝。袒裼驗膚而破獄。）是皆德惠在民而入祀名宦者也。

第十一課 名人事跡（二）孝友

百行以孝爲先。宋有負薪養母者。蔡寔發也。屈喪

廬墓者。王凱則年逾四十。廬墓三年不忍去。張讀則蔬食廬墓。爲後世式。至林彬領鄉薦而不忍離母。罷上春官。與楊寅侍父。至爲眞西山。以二孝目之者。均不愧爲人子也。曾孝純以所得俸予族人。治家有法。子弟非衣冠不見。則以友行聞於當時。尤足爲後世法矣。

第十二課 名人事跡(三) 文學

以文章名世者。唐有歐陽行周。名慶爲閩開科進士。

(一)以第二人登第。授四門助教。(一)與韓文公齊名。宋有曾宗元。文藻敏給。(一)亦登進士第二人。(一)官至集賢殿修撰。明有黃景昉。七歲能文。(一)登第後。以義直聞。曾爲相十月。退歸。(一)著述甚富。蘇濬字紫溪博涉書史。所爲文蒼淵宏肆。(一)仕歸講學。過山水佳處。浩歌曠達。品性高潔。(一)論晉江文學之淵。當以四人爲宗矣。

第十三課 名人事跡(四) 理學

泉諺曰。山有清紫朋羅。人有蒙淺存達。蓋指蔡虛齋陳紫峯林次厓王晦生而言也。虛齋紫峯。一著四書蒙引。從祀孔廟。一著四書淺說。直接薪傳。陳為蔡之皆晉江籍。次厓著四書存疑。晦生著四書達信。高弟一為同安人。一為南安人。皆從祀孔子廟廷者。其他如蘇紫溪之四書兒說。亦與蔡陳齊名。林素菴之講明旦氣。與黃景昉等建講堂于樓綠園倡明旦之學尤為探孔孟之淵。悟關閩之緒者也。

第十四課 名人事跡（五）忠義

盡心於國為忠。行我所安為義。明周天佐以抗疏救楊爵。受廷杖。繫獄死。直聲振遐邇。謚忠愍。（楊爵曰。子生極南。予生極北。而以救我殞命。悲哉。）蔡道憲少負氣節。任長沙推官。死獻忠之難。事甚慘烈。（被戮時血濺獻忠。為之昏仆。）謚忠毅。是為忠義之著者。

第十五課 名人事跡（六）治績與武功

施世綸任御史。以直聲聞。巡撫雲南。澤遍窮簷。顧
珀宰旌德。公平明斷。以足民食爲先。他邑災而晉
獨安。以治行旌於朝。任四川按察副使。整戎機。威
羌族。兪大猷。少受易於王宣。又知兵事。曾出奇計。
討平峒蠻。助總兵符。先後數十年。戰績甚著。治績
武功。三人爲著矣。

第十六課 名人事跡（七）隱逸

宋莊圭復字容齋篤志勵學。時值荒難。手不釋卷。宋亡。

隱於青陽。大府以學行聞於朝。屢徵不起。洪承峻
有逸才。善草書。如驚蛇入草。枯藤掛壁。明亡。隱居
不仕。逍遙巖壑。憤其兄承疇之爲貳臣。建唐忠烈
祠於洪衙庭之東。以愧之。所書祠額。龍蛇飛舞。今
猶存焉。

第十七課 金石

周欵器。在宋賜傅伯壽。迄明猶藏於傅氏。蔣德璟
爲之記。宋淳化閣帖。所謂馬蹄真跡之石刻。其始

卽得自泉城。洛陽亭宋人之修禊篆記。蔡忠惠祠之萬安橋記。紫帽峯之宋皇祐趙君重九登高磨厓。開元寺之宋柳三娘石塔題記。及宋經幢。皆宋時金石之著者。至重修學宮碑記。則又明碑之佳者。

第十八課 美術

美學爲近世所尙。明張壽黏本盛。均工書法。承天寺月臺二字。壽所書也。清源洞之第一洞天四字。

本盛所書也。蘇朝善範銅器。所鑄鼎彝。古色精美。此晉邑金工之始祖也。王弼小名盛世旣工詩文。書畫尤善。塑土寫真。及塑諸仙佛。此雕塑工原祖也。同時有何朝宗者。善製陶像。人爭寶之。陶碧精篆印。足啓雕刻之思。郭吉雲。精繪事。足徵審美之情。蔣沂泉。精醫學。爲人治病。往往出奇方愈之。是亦專科之學也。

第十九課 女範

宋謝伯景母。好學通經。教子有方。工詩。歐陽修稱其隱約深厚。守禮不放。有古幽閒淑女之風。明柯遷之母羅氏。遣子就學於王陽明。謂之曰。勿慕榮利。勿矻矻於章句。惟道是從焉。黃公憲妻楊氏。夫歿姑老。孝事之。教二子成名。陳宓題其墓碑。蔣德璟之祖母。少年撫孤事姑。及姑年九十八。黃道周爲之誌墓。并書。宋呂仲洙女。刃股爲粥。以瘳母病。眞德秀表其門曰懿孝。且爲之記。翁慶女詣闕上

書。請代父罪。仁孝皇后。召入宮。爲女師。三月。人以比緹索。謝母柯母。賢母也。黃妻蔣母。賢婦也。呂女翁女。孝女也。之六人者。可以爲女範矣。

第二十課 官制

舊設知縣。屬泉州知府。佐以縣丞。巡檢典史。府學有教授。縣學有教諭。武職則有營守備。千總。把總。光復後。以縣知事總邑政。佐以椽屬四科。及典獄承審二職。警察所長。知事兼任。設警佐一。以掌警

務。地方軍隊隨時調防。或旅或團。無定制。

第二十一課 教育

學校教育。有省立縣立私立之三種。今有中學校三。實業學校二。高等小學。國民學校。在城廂內外。男女各校二十餘所。四鄉小學七十餘所。師範學校。則有柿樹兜鄉蔣氏所立之一校。陳氏所立之啓明女師範。李氏所立之佩實女師範。各一級耳。全境學生。共計約九千人。教育會。勸學所。則一爲

研究教育之機關。一爲地方教育行政之機關。二者之性質。固各不同也。

第二十二課 實業

濱海漁業及鹽業。自宜籌畫進行。農田耕種。悉未改良。境多荒山。猶未造林。通商則邑民遠涉南洋羣島者殊多。工事則公司局廠殊少。使人缺乏作工之地。晉江實業。非有人從事提倡振興不可。

第二十三課 物產

海產則有魚蛤牡蠣蝦蟹江珧之屬。陸產則有茶蔗荔枝楊梅龍眼梨柿稻麥瓜豆番薯之類。販賣利益。則以茶荔枝龍眼糖蔗數種。爲出口之大宗。至於礦產。則藏寶於地。尙未發現何種礦物。惟探驗巖石。則清源紫帽等山。有花岡岩。石灰岩。輝綠巖。角閃巖四種。而白石英及矽沙。則隨地可拾。是皆足供礦學之研究者。

第二十四課 交通

交通之具。曰電報輪船郵政汽車四項。電報郵政。消息靈通。航路則秀土及安海。均有小輪。以通廈門及福州。汽車則自安海以至南門。往來尙便。而舊時驛路。早廢棄之。近則城中馬路正在建築。而四鄉寥闊。尤非注意路政。不足盡交通之便利也。

第二十五課 課稅

對於國家所納之稅。則地丁漕糧爲正稅。對於地方所納之稅。則有房捐警捐雜稅等。而海關設於

南門。釐局設於各鎮。是爲貨物稅。專收諸貨。船往來。商販貿易者也。

第二十六課 風俗（一）鴉片及纏足

民俗儉約。四鄉皆同。芒鞋負擔。男女相同。此習俗之優點也。惟有儉不中禮。赤足木屐。衣冠不正。嗜好未除。百事廢弛。亦有纏足婦女。不出戶庭。而絕無知識。此又習俗之宜改良者也。（四鄉種鶯粟者。尙未禁絕。）

第二十七課 風俗（二）迎神賽會

元宵燈綵。端午龍舟。猶不失爲歲時行樂之旨。然迎神賽會之舉。往往耗費金錢無數。舉國若狂。所謂神姐。所謂跳童。將人作鬼。披髮佯狂。白刃砍臂。鐵簽穿額。斂錢之法愈奇。迷信之風益盛。病不求醫。求諸神。錢不妄用。用諸會。其愚也甚矣。

第二十八課 風俗（三）孟蘭及演劇

清明秋社。以粿肴掃墓。猶見祭先敬祖之誠。此風

俗之純者。乃至七月中元。作盂蘭會。普渡衆生。佛事道場。牲酒煙火。宴賓觀劇。消耗金錢。殊可慨矣。至於喜慶。則演劇酬神。視爲常例。一戲有掌中傀。偶七子大班等。一喪禮則僧道鼓鏡。喧闐追薦。爲死者脫罪。是又禮俗之宜改革者也。

第二十九課 風俗（四）風水及械鬪
卜宅建厝。動關風水。停柩擇地。遺害良多。往往以尺土之競爭。片言之拒斥。小則興訟。大則械鬪。同

鄉異姓。或異鄉至戚。一旦決裂。彼此不顧。千元一命。蠻例時行。安得教育普興。一變此迷信之風。悍蠻之習也。

第三十課 風俗（五）早婚及鬧房

早婚之弊。弱種傷生。鬧房之習。悖禮害義。有年十四五。卽行婚禮者。生子女必弱。且易罹疾病。至俗尙鬧房。作種種戲謔之言動。強制執行。欺玩新婦。摧殘女權。莫此爲甚。安得女學普興。一掃此惡習。

也。

第三十一課 疫原與衛生

地方衛生自治之要也。乃溝水積污。坑廁雜置。聚蚊成雷。飛蠅四集。死鼠不檢。沐浴無時。製造疫癘。互相傳染。可畏也已。安得地方自治。首重衛生。開溝渠。築道路。建醫院。設公廁。灑油於穢水。以絕蚊之生。釘紗於窗戶。以絕蠅之集。多養貓以殺鼠。常沐浴以潔身。春瘟秋瘡。其少衰乎。

第三十二課 奇樹明新

昔者鄉多柿樹。故名柿樹兜鄉。繼以讀音之誤。柿爲奇。遂易今名。鄉之四圍。約四里。東接亭上斗南二鄉。西接新宅鄉。南接山後鄉。北接上塘寨仔二鄉。位置紫帽山東麓。產荔枝龍眼最多。茶樹產五俞山。精製毛猴。佛手龍鬚等奇種。居民皆蔣姓。多經商南洋者。明新一校。有師範部。小學部。女學部。學生共二百四十餘人云。○此爲民國十一年九月之學生數。

